

DOATSU EUSKALDUNAK

DAGONILLAK 19

Ezekiel Moreno Doatsua. Gotzaiña.

Alfaro'ko errian, orduan Tarazona'ko eleiz-barrutian jaio zan, 1848 urtean.

Amasei urtekin Agustindarren ordenean sartu eta Filipinas'era joan zan, eta bere Meza-barría Manila'n emon eban.

Bere abade lanetako lenengo 16 urteak, Filipinas'en bertan emon ebazan, arrigarizko arriskuak igaroz.

Gero Monteagudo'ko Prior izendatu eben, baiña andik lasterrera Kolonbia'ra bialdu eben, Pasto'ko gotzain legez. Lurralde onetan be, lan gogorak eta latzak egin ondoren, Erroma'ra joan zan, Aita Santuari gotzain-karga kentzeko eskatzera. Baiña Aita Santua León XIII garrenak au erantzun eutson: "Zoaz osterá be zeure eleiz-barrutira. Eleizak olakoxe gotzainak bear ditu".

Monteagudo'n il zan 1906 urtean.

DAGONILLAK 20

Zudaire'ko Esteban eta Maiorga'ko Joan, martiri doatsuak.

Lenengoa Goi-Naparroa'n jaioa zan, Zudaire'ko errian; bigarrena, barriz, Be-Naparroa'ko Donibane Garazi'n.

Biak Loiola'ko Inazio'ren Xesusen Uagundian bizi ziran.

Ameriketa'n mixiolari izateko asmoz, Brasil'era joateko Lisboa'n itsasoratu ziran, baiña itsasoko bidean protestante piraten eskuetan jausi ziran.

Itxasontziko kapitaiak gure martiriei, euren buruak zaintzeko piraten aurka ezpatak artzeko eskatu eutsen; baiña gure mixiolariak erantzun eutsoen: "Gu ez gara soldaduak, mixiolariak baiño, eta gurago dogu geure odola emon, besteena isuri baiño".

Ez gara Brasil'era elduko, baiña zeruan mixiolari izatera goaz.

IRAILLAK 30

Urte onetako irailaren 30'ean Erroma'n DOATSUEN maillara jaso dabe Bilbotar emakume ezkondu bat, zazpi seme-alaben ama: Ibarra'tar Rafaela. Ez dira ezkondu asko altaretan ikusten.

Deustu'n jaio zan 1853 urtean. Gaztetan ez eban santutasun asmo andirik izan... 18 urte zituela Jose Vilallonga, Katalunyako industrilari ospetsuarekin ezkondu zan.

Ezkondu ondoren etxeko-andra onen ardurarik andiena —bere sendiko lanen ondoren— au izan zan: baserrietatik Bilbo'ra aberatsen etxeetara zerbitzera etorten ziran neska gazteai laguntza emotea.

Orretarako, Begoña ondoan, "Los Angeles Custodios" izeneko etxe eder eta zabala sortu eban. An zaintzen ebazan, ama baten maitasunez, jana, lotokia baita lana aurkituz, etxe aretara joan nai eben neska gazteak.

45 urtekin alargundu zan, eta bere seme-alabai bizimodua emon ondoren, berak sortutako lekaimeen KONGREGAZINOAN sartu nai izan ebenean, urdailleko minbiziak jota, 1900 urtean il zan.

Eriotzako orduan berak sortutako lekaimeai esan eutsen:

Nire eriotzagatik ez zaiteze biotz-illundu. Zerutik lurrera kate bat egingo dogu, Jaungoikoaren ondotik nik zuei laguntzeko".

GOIKOETXEA'TAR INAKI